

**Ўзбекистон Республикаси олий таълим муассасаларининг бакалавриатига  
хорижий фуқароларни қабул қилиш учун суҳбат ўтказиш ва унинг  
натижаларини белгилаш тўғрисидаги  
МУВАҚҚАТ ЙЎРИҚНОМА**

Мазкур Муваққат йўриқнома Ўзбекистон Республикаси олий таълим муассасаларининг бакалавриатига хорижий фуқароларни ўқишга қабул қилиш учун суҳбат ўтказиш ва унинг натижаларини белгилаш тартибини ўз ичига олган.

**1. Умумий қоидалар**

1. Ўзбекистон Республикаси олий таълим муассасаларининг бакалавриатига хорижий фуқароларни қабул қилиш учун суҳбат (бундан буён матнда суҳбат деб юритилади) қуйидагиларни аниқлаш нуқтаи назаридан ўтказилади.:

касбий иштиёқи ва ўқишга кириш сабаблари (танланаётган таълим йўналишининг моҳияти ва мазмуни, унинг жамиятдаги ўрни ва аҳамияти, ушбу таълим йўналиши бўйича касбий фаолият турлари ва касбий фаолият объектлари тўғрисидаги маълумотга эгаллиги, Ўзбекистон Республикаси олий таълим муассасасида олий маълумот олиш учун сабаб, шунингдек, айнан мазкур олий таълим муассасаси ва таълим йўналишини танлашга ундаган сабаблар);

таълим йўналишига мувофиқ келувчи фанлар мажмуаси бўйича эгаллаган билим даражаси (Таълим муассасаларига ўқишга қабул қилиш бўйича Давлат комиссияси томонидан тасдиқланган фанлар мажмуаларига мувофиқ);

умумий интеллектуал даражаси (ўз фикрини аниқ-равшан, мантиқий ва ижодий баён қила олиш ҳамда ўз фикрини асослантира олиш қобилияти).

2. Суҳбат олий таълим муассасаси ректорининг буйруғи билан тузиладиган Махсус комиссия (бундан буён матнда Махсус комиссия деб юритилади) томонидан ўтказилади.

Махсус комиссия ўз фаолиятини коллегиялик, ошкоралик ва шаффофлик, холислик ва бетарафлик принциплари асосида амалга оширади.

Махсус комиссия таркибига олий таълим муассасаси ходимлари билан бир қаторда бошқа ташкилотларнинг вакиллари ҳам уларнинг раҳбарлари билан келишилган ҳолда киритилиши мумкин.

Махсус комиссияга раис бошчилик қилади ва олий таълим муассасаси ректори лавозими бўйича Махсус комиссия раиси ҳисобланади. Махсус комиссия фаолиятини ташкилий жиҳатдан таъминлаш унинг котибига юкланади.

3. Суҳбат жорий йил август ойининг **1-10 саналарида** ўтказилади.

4. Суҳбат олий таълим муассасасининг хорижий фуқаро ўқишга ҳужжат топширган таълим йўналиши бўйича ўқитиладиган тилда ўтказилади.

5. Суҳбатнинг ушбу тартибга қатъий риоя этган ҳолда ташкил этилиши ва ўтказилиши учун масъулият тегишли ўқув йили учун тузиладиган олий таълим муассасаси Қабул комиссияси масъул котибига юкланади.

**2. Суҳбат ўтказишга тайёргарлик кўриш**

6. Олий таълим муассасаси Махсус комиссиясининг суҳбат ўтказиш бўйича иш режаси олий таълим муассасаси ректори томонидан тасдиқланади.

7. Махсус комиссиясининг суҳбатни ташкил этишдаги асосий вазифалари қуйидагилар ҳисобланади:

суҳбат жараёнининг адолатли ўтказилишини таъминлаш;

суҳбат ўтказиш билан боғлиқ зарур шароитларни яратиш;

олий таълим муассасасига ўқишга кириш ва унда таълим олиш, шунингдек олий таълим муассасасида яратилган шароитлар ҳақида хорижий фуқароларга ахборотлар ва маълумотномалар тақдим этиш;

хорижий фуқароларга суҳбатнинг натижалари ҳақида маълумот тақдим этиш.

8. Бинолар ва аудиторияларни суҳбат ўтказиш учун тайёрлаш масъулияти олий таълим муассасасининг қабул бўйича масъул котибнинг ўринбосари зиммасига юкланади.

### **3. Суҳбат ўтказиш ва унинг натижаларини белгилаш**

9. Хорижий фуқароларнинг суҳбатдан ўтиши мажбурий ҳисобланади.

10. Суҳбат ўтказиш жадвали масъул котибнинг тақдимномасига биноан олий таълим муассасаси ректорининг буйруғи билан тасдиқланади. Суҳбатдан ўтувчи хорижий фуқароларнинг рўйхати буйруққа илова қилинади.

11. Суҳбат, қоида тариқасида, олий таълим муассасаси биноларида ўтказилади.

12. Хорижий фуқаролар суҳбат ўтказиш учун бинога тегишли навбат бўйича олиб кирилади.

13. Хорижий фуқаро томонидан суҳбатга китоб, дафтар, ёрдамчи восита, мобил телефон ва бошқа алоқа воситаларининг олиб кирилиши ва улардан фойдаланилиши қатъиян тақиқланади.

14. Хорижий фуқаро аудиторияга Махсус комиссия котиби томонидан таклиф этилади.

15. Суҳбатда қатнашиш учун хорижий фуқаро паспорт асосида киритилади.

16. Суҳбат натижалари баллар қўйиш йўли билан 100 баллик тизимда ушбу йўриқноманинг 1-илоvasида кўрсатилган мезон бўйича баҳоланади.

17. Хорижий фуқаролар жадвал бўйича суҳбатга келмаган ҳолларда 0 балл қўйилади.

18. Суҳбат натижаларини белгилаш учун Махсус комиссиянинг ҳар бир аъзоси бошқа аъзолардан мустақил равишда мазкур йўриқноманинг 1-илоvasида келтирилган шаклдаги баҳолаш варағини тўлдириб, уни имзолайди ҳамда Махсус комиссиянинг котибига топширади. Махсус комиссиянинг котиби Махсус комиссия аъзолари томонидан хорижий фуқарога қўйилган ўртача баллни ҳисоблаб чиқади.

19. Хорижий фуқаро жами 55 ва ундан юқори балл тўплаганда суҳбатдан ўтган ҳисобланади.

20. Суҳбатдан ўтган хорижий фуқаролар рўйхати улар томонидан тўпланган баллар асосида рейтинг тизимига мувофиқ аниқланади.

21. Сухбат жараёни ва натижалари Махсус комиссиянинг барча аъзолари томонидан имзоланадиган ва олий таълим муассасаси ректори томонидан тасдиқланадиган йиғилиш баённомасида қайд этилади.

Сухбат жараёни ва натижаларини қайд этиш учун видео ва аудиоёзув қўлланиши мумкин. Бундай ҳолларда видео ва аудиоёзув 24 соат ичида Махсус комиссия раисига тақдим этилади.

22. Олий таълим муассасаси бакалавриатига хорижий фуқароларни қабул қилиш учун сухбатни қайта ўтказиш тақиқланади.

23. Сухбат натижалари шикоят қилиниши ва апелляция тартибида қўрилиши мумкин эмас.

24. Сухбат натижалари 15 августга қадар олий таълим муассасасининг бакалавриатига хорижий фуқароларни қабул қилиш ҳақида қарор қабул қилиш учун Олий ва ўрта махсус таълим вазирлигига ҳамда Ўзбекистон Республикаси таълим муассасаларига ўқишга қабул қилиш Давлат комиссиясига юборилади.

#### **4. Махсус комиссия таркиби**

Ўзбекистон Республикаси олий таълим муассасасиларининг бакалавриатига хорижий фуқароларни қабул қилиш учун ташкил этиладиган 7 кишидан иборат Махсус комиссия таркибига қўйидагилар киритилади:

1. Ректор;
2. Халқаро алоқалар бўлими бошлиғи (*котиб*);
3. Олий таълим муассасаси Қабул комиссиясининг маъсул котиби;
4. Махсус комиссия аъзолари (4 киши).

Махсус комиссия аъзолари сифатида сухбат ўтказиладиган йўналишлар бўйича олий таълим муассасаси кафедра мудирлари, профессор-ўқитувчилари ва мутасадди ходимлари киритилади.

#### **5. Яқуний қоидалар**

25. Мазкур йўриқнома талаблари бузилишида айбдор бўлган шахслар қонун ҳужжатларида белгиланган тартибда жавоб беради.

(ОТМ номи)

**бакалавриятига хорижий фуқароларни ўқишга қабул қилиш учун ўтказилган  
суҳбат жавобларини  
БАҲОЛАШ ВАРАҒИ**

Сана \_\_\_\_\_

(Хорижий фуқаронинг Ф.И.Ш.)

(фуқаролиги)

(таълим йўналиши)

№	Баҳолаш мезонлари	Баллар (тах. 100)
1.	<b>Касбий иштиёқи ва ўқишга кириш сабаблари</b> (танланаётган таълим йўналишининг моҳияти ва мазмуни, унинг жамиятдаги ўрни ва аҳамияти, ушбу таълим йўналиши бўйича касбий фаолият турлари ва касбий фаолият объектлари тўғрисидаги маълумотга эгаллиги, Ўзбекистон Республикаси олий таълим муассасасида олий маълумот олиш учун сабаб, шунингдек, айнан мазкур олий таълим муассасаси ва таълим йўналишини танлашга ундаган сабаблар) (тах. 25 балл)	
2.	<b>Таълим йўналишига мувофиқ келувчи фанлар мажмуаси бўйича эгаллаган билим даражаси</b> (Таълим муассасаларига ўқишга қабул қилиш бўйича Давлат комиссияси томонидан тасдиқланган фанлар мажмуаларига мувофиқ) (тах. 50 балл)	
3.	<b>Умумий интеллектуал даражаси</b> (ўз фикрини аниқ-равшан, манتيқий ва ижодий баён қила олиш ҳамда ўз фикрини асослантира олиш қобилияти) (тах. 25 балл)	
<b>Жами:</b>		

Махсус комиссия раиси:

\_\_\_\_\_ (Ф.И.Ш., лавозими)

\_\_\_\_\_ (Имзо)

Махсус комиссия аъзоси:

\_\_\_\_\_ (Ф.И.Ш., лавозими)

\_\_\_\_\_ (Имзо)

Олий таълим муассасасининг қабул бўйича масъул котиби

\_\_\_\_\_ (Ф.И.Ш., лавозими)

\_\_\_\_\_ (Имзо)

Махсус комиссия котиби

\_\_\_\_\_ (Ф.И.Ш., лавозими)

\_\_\_\_\_ (Имзо)